

## «Igl avegnir duei la giuventetgna esser pli presenta»

La 164avla ediziun dil Calender Romontsch ei sin meisa. In trio da redactur(a)s cul president dalla Surselva Romontscha, Toni Vinzens alla testa, ha procurau ella. Il calender 2023 ei sco ses antecessurs, era cullas rubricas che dattan structura. Igl avegnir duei ei dar entginas midadas, la giuventetgna duei haver in plaid pli ferm el capitel.

Hans Huonder/FMR

Culla fin digl onn vargau ha *Lisa Schmidt-Candinas* remess sia funcziun sco redactura e responsabla pil Calender Romontsch. L'editura – la Somedia – ha allura contactau in tschuppel persunas culla finamira da cattar ina successiun. La fin finala ei la Surselva Romontscha seddeclarada promta da surprender l'egida redacziunala dil Calender Romontsch. Il niev president da quella – *Toni Vinzens* – ei semess els stadals e communablamein cun *Lisa Schmidt-Candinas* e *Martin Cabalzar* – omisqus anteriurs redacturs dil pli vegl annuari romontsch – ei l'ediziun 2023 veginida planisada, preparada ed uss publicada. Ton dil format, dallas scartiras sco dalla structura ei il calender restaus aschia sco ses antecessurs. Quei ei bien aschia, pertgei la cunituitad grafica e structurala ei d'impurtonza, midadas regularas irriteschan il lectur. Auter ei quei se capescha tiel cuntegn. Era pil 2023 ei quel varionts ed interessants. Igl avegnir dil calender ei garantius: «La Surselva Romontscha ha decidiu da cunituar culla responsabladad redacziunala dil Calender Romontsch», di Toni Vinzens.

## Dapli per la giuventetgna

«Il temps per far pli grondas midadas ha muncau uonn», di Toni Vinzens che habitescha a Rueun. Cul tgau engiu vul el denton era buca metter il calender igl avegnir: «La structura sco tala ei seguir secumprovada, era igl accent da mintga calender. Igl avegnir less jeu denton empruar d'involver pli fetg la giuventetgna el Calender Romontsch, seigi cun contribuziuns da quella ni temas ch'interesseschan ella.» Ideas co far quei ha Toni Vinzens pliras, mo ina via para ad el aunc adina la pli empermittenta: «Quei ei seguiramein il contact persunal.»

## Rubricas cumprovadas

Aschia duei il calender viver igl avegnir da rubricas cumprovadas sco il calendari ni era la scolaziun ed il cumiau. Temas d'auturs pli giuvens duein buca mo regiuvinar il cerchel dils auturs, mobein era animar la giuventetgna da sfegliar e leger el calender igl avegnir: «Jeu less empruar da contonscher ina sauna mischeida denter auturs giuvens e vegls, mo era temas per giufen e vegl. Jeu patratgel per exemplu era vid lavurs da matura, Bachelor ni Master che vegnan screttas e che mo pauca glieud ha la cuida da leger. Ei dess seguiramein pusseivladads da presentar quellas en ina versiun cuorta per romontsch», puntuescha il cauredactur dil

Calender Romontsch. Patratgs duein denton era veginir fatgs davart in niev maletg per la cuviarta.

## Cuntinuar en in team

«Lisa Schmidt-Candinas e Martin Cabalzar ein s'engaschai ella redacziun per l'ediziun dil Calender Romontsch 2023. Igl avegnir stattan els a disposiziun per segidar sch'ei fa da basegns, mo la Surselva Romontscha vegin a formar ina nova redacziun», di Toni Vinzens. Alla seduta dalla suprastonza la fin da november duei veginir fatg patratgs concrets tgi ch'appartegn alla redacziun sper Toni Vinzens sco cauredactur. Quei sappi esser suprastont(a)s dalla Surselva Romontscha, en damonda vegini denton era ina persuna ni l'autra interessada d'ordeifer. La lavur redacziunala duei veginir repartida vinavon sin pliras schuialas.

## 2024 sin «viadi»

«Libertad» ei igl accent dil Calender Romontsch per l'auter onn e cun accents less Toni Vinzens era cuntinuar igl avegnir: «Pigl onn 2024 savess quei esser il tema viadi. Glieud che fa viadis liungs mo era cuorts. Glieud ch'emigrescha, la viafier ni era il viadi ord vesta historica. Igl onn 2024 duei denton era veginir dau spazi al giubileum da 600 onns dalla Ligia Grischa.»

## In accent ella presentaziun

Igl avegnir vul Toni Vinzens denton era procurar per ina megliera preschientscha publica dil Calender Romontsch: «En sesez entscheiva quei gia tier sia presentaziun mintg'onn igl atun. Tenor miu manegiar savess quei succeder igl avegnir empau pli prominent, per exemplu cun ina presentaziun publica en preschientscha dallas auturas e dils auturs. Ei füss segiramein era interessant sche quels havessen la caschun da sescuntrar.» Sco mied da publicaziun ha il Calender Romontsch era la pusseivladad da promover giuvnas e giuvens cun plascher da scriver ed aschia eis el ina caschun da s'introducir ella lavur publicistica ed il medem mument da sefatschentar dil plaid romontsch scret.